

靈寶領教濟度金書卷之一百七十一

垂二

靈寶領教濟度金書卷之一百七十一 無二

洞微高士開光救苦真人寧全真授

靈寶通玄弘教水南先生林靈真編

科儀立成品

預修黃錄齋用

三官醮儀

步虛

燒香頌

各禮師存念如法

衛靈呪

五星列照 煥明五方 水星却災 木德致昌

熒惑消禍 太白辟兵 鎮星四據 家國利亨

名刊玉簡字錄帝房乘飈散景飛騰太空  
出入冥無遊宴十方五雲浮蓋招神攝風  
役使萬靈上衛仙翁和輿道合真

鳴法鼓二十四通

无上三天玄元始三炁太上老君召出臣身

垂二

中三五功曹左右官使者侍香金童傳言玉  
女五帝直符直日香官各三十二人出出者  
嚴裝關啓玄壇天帝神君當召此間土地里  
域真官正神急上關啓臣今奉為入齋意以

今陞壇設醮願得



玉清道炁靈寶妙光下降流入臣等身中即  
使玄壇清淨內外成真天无氛穢地絕妖塵  
琳琅振響十方肅清萬魔不干真誠上徹令  
臣所啓速達徑御

太上无極大道三元三官大帝御前

請稱法位

具位臣某與臨壇官衆等謹同誠上啓

真都元陽七寶紫微宮總主上真自然大聖  
上元一品賜福天官大帝君中元太陽洞曜  
元君二品赦罪地官元虛洞靈大帝君下元

金靈洞陰大帝三品解厄水官洞真太皇元  
光大帝君上元紫微宮左右中三府主陰陽  
水火生死罪錄官上元太極左宮左右中三  
府主陰陽水火生死罪錄官上元太極右宮  
左右中三府主陰陽水火生死罪錄官中元  
洞空清靈宮左右中三府主陰陽水火生死  
罪錄官中元南洞陽左宗天宮左右中三府  
主陰陽水火生死罪錄官中元北豐都右陰  
天宮左右中三府主陰陽水火生死罪錄官  
下元賜谷洞源青華宮左右中三府主陰陽

卷二

二



水火生死罪錄官下元清泠左南水會宮左  
右中三府主陰陽水火生死罪錄官下元北  
鄴都右羅鄴宮左右中三府主陰陽水火生  
死罪錄官上元三十六曹仙官中元四十二  
曹仙官下元四十二曹仙官三元九宮二十  
七府百二十曹考士考兵考吏虛空鑒察香  
官土地醮筵內外一切威靈伏聞元始開圖  
敷十華之祖炁虛皇御運宏三極之神功調  
化瑟以幹陰陽運靈樞而裁經緯雲聯官府  
金符承紫闕之嚴星列班僚玉律握玄都之

峻包羅幽顯囊括玄黃凡歸陶冶之中悉囿  
範圍之內今有弟子某洗心慕道潔已朝真  
津梁遵受度之科柱石建預修之典緬維主  
宰藉紀玄綱爰陳采藻之真忱恪贊傾葵之  
庸敬伏願雲輿順動勅鹵簿以前馳鳳輦徘  
徊列旌旄而後從俯臨玄墀曲鑒丹勤臣不  
勝激切顙望之至再拜奉迎

聖駕

請聖

初獻

重稱法位



具位臣某謹重誠上啓

三官大帝九府仙靈主執曹僚無鞅聖衆伏  
聞道紀巍巍宏真風於九地神威赫赫承化  
雨於三天威儀昭靈寶之經科禁翼玄元之  
簡三官職憲上檢天中檢地下檢仙九府操

權左主火右主水中主錄羅萬靈而研毫髮  
提羣品而校錙銖氷鑑無私若煥烈日嚴霜  
之峻水衡有準常宣光風霽月之和凡切切  
以皈神必昭昭而度命今弟子某夙培慶運  
獲際昌辰覩藥笈之輝煌慨芝圖之煥耀念



三塗五苦易飄業網於千生而九戒二符可  
棹慈航於萬劫清微神力黑鬱靈功爰崇虛  
梵之壇肅啓飛玄之笈修齋稽顙遵黃籙以  
祈恩行道勤奉企碧霄而謝過固期願於今  
世植純嘏於他時况四十九年之非回頭惟  
省顧三百六旬之迅轉眼成空索裘宜謹於  
先寒徹土匪求於後雨孰主張是願聖威昭  
捨舊之恩式輔翼之廣愚悃勵自新之志不  
在大不在小悉歸鶴赦疑惟輕疑惟重總被  
鴻私一塵不染於靈天萬劫常居於樂地如

蒙丹禱允拜洪休臣無任虔祝之至

亞獻

具位臣某謹重誠上啓

三官大帝九府仙靈主執曹僚無鞅聖衆伏  
聞上帝宣慈丹簡侈度生之澤下民後德玄

卷二

四

曹垂落死之尊况三元為監察之都曹而九  
霄付銓量之政柄蒼蓋虛無之境班列紫微  
黃輿寥廓之墟權提黑朔統歸墟而莅政位  
暘谷以承符黜幽陟明朱墨凜然於圖籍禍  
淫福善丹青炳若於簡書况真聖歲三會而



議愈公顧黔黎時屢遷而業益盛一朝失脚  
九夜寒心匪憑提拔之功曷免顛冥之苦今  
弟子某顛天激切扣地凌兢禮道禮經禮師  
冀徼後福皈身皈神皈命願削前愆拳拳推  
赤之心切切回青之惠伏願爲民父母作帝  
股肱體龍戒之慈雲贊鳳符之惠露移名真  
籍此生之冤囿冰清勒字青編他世之慶基  
日闢運應歸於滅度神即證於超凌受化更  
生不經苦惱升真度品永脫輪迴成道果於  
未來襲德釐於見在精神恍茂壺中之日月

長新步武高華門外之風波不染金花潤曉  
玉樹長春百年膺五福之全七世耀三華之  
威傾葵激切采藻勤拳更願萬象澄輝百昌  
茂育水池火沼消考對之因緣劒樹刀林息  
推研之條目化夜壑為春臺之境變寒庭為  
夏屋之區均證無為永超有漏臣等思真宴  
坐翊教徑行百八十科條慮乖丹律萬二千  
戒行或冒玄章每淵涉以兢兢願海涵而蕩  
蕩庸逃三褫匪勤九遷臣無任虔禱之至



具位臣某謹重誠上啓

三官大帝九府仙靈主執曹僚無鞅聖衆伏  
聞黍稷非馨投李謾旌於蟻悃芻蕘可聽采  
芹曷報於洪恩仰臨下之森羅露由中之懇  
切幸殫萬一敢瀆再三以今玉漏聲微銀河  
影轉息琳琅於鳳簾消縹緲於鸞篝翠葆雲  
龍將返冥濛之仗珠幡月駟行迴蒼莽之輿  
萬仙翼駕以旋真衆聖翊轅而騰景臣瞻仰  
徒切攀戀無階寸丹誓罄於金蘭烟霞志適  
尺素僭陳於環草風火驛傳臣無任不勝激

切攀戀之至再拜奉送

十二願

一願乾坤明素

二願氣象清玄

三願聖人萬壽

四願化洽八埏

五願天垂甘露

六願地發祥煙

七願四時應候

八願萬物生全

九願家多孝悌

十願國富才賢

十一願齋功廣被

十二願善瑞日臻

存神燒香

香官使者左右龍虎君侍香諸靈官當令

臣



設醮行道之所自然生金液丹碧芝英百靈  
衆真交會在此香火爐前令臣學道得道求  
仙得仙齋官獲福幽顯沾恩十方仙童玉女  
侍衛蘭烟傳臣向來所啓速達徑御  
太上无極大道三元三官大帝御前

垂二

六

### 回輶頌

回輶五雲輿

騰駕九章歌

倏忽冲天遠

醮壇香氣多

玄思覃宇宙

福祿遍山河

緬想神仙路

逍遙上大羅

焚燎

禮謝三官儀

切以性無今古由天道而輪迴形有去來企  
人生之變化惟定水波翻於覺海故業山霧  
擁於靈源袞袞百年既業機而自織悠悠九  
夜宜冤網以相隨坎壈一朝淒涼萬古倘匪  
今生之預禱曷繇來世之無憂今預修弟子  
某籲天激切以陳情扣地凌兢而露悃念形  
骸暫寄惟欣見在之因緣而性識終迷孰滌  
未來之罪垢莫伸手援第劇心馳仰龍符鳳  
戒之玄津梁福壽而鸞笈虬籤之妙砥柱禎



祥生生克免於沉淪世世必臻於快樂靖惟  
主宰實藉權衡敢殫懇禱之勤庸致皈依之  
敬伏願昭回帝鑒垂憫民情敷善藥以長新  
斬惡根而永謝運應滅度疾登廣漢之鄉神  
證超凌無墮幽寥之境逍遙玄極遊宴綠羅

垂二

七

仰冀慈悲俯垂明證

福生無量天尊

引詣天官座前上香設拜

以今恭焚寶香供養

玄都紫微宮上元一品天官賜福紫微大帝

君恭望聖造權領天曹凡學士百姓子生前  
結習惡緣犯上元威儀六十條他日身經太  
陰則天官三十六曹攝之如能膺戒佩符可  
免苦惱今有預修弟子某按金科而受度遵  
玉訣以預修崇建寶齋懺祈瑤陛皈命

上元一品天官賜福紫微大帝君伏願憲天  
宥過體道垂慈見在福基既巍我於一世未  
來慶址應堅固於千生地司無逼合之憂天  
府有超凌之望愆尤落滅考對停閑法衆運  
誠輒伸善頌



天官赫奕位玄都

賜福權尊握化樞

上幹權衡司憲令

下提綱紀典謀謨

停愆盡削三生籍

受度應標萬古圖

惟願慈仁推有造

形神無復墮三途

弟子拜退引詣

地官座前上香設拜

以今恭焚真香供養

小有清虛宮中元二品赦罪地官大帝君恭  
惟聖造權領地官凡學士百姓子生前結習  
惡緣犯中元威儀六十條他日身經太陰則

地官四十二曹攝之如能膺戒佩符可免苦  
惱今有修齋弟子其按金科而受度遵玉訣  
以預修崇建寶齋懺祈瑤陛皈命

中元二品赦罪地官大帝君伏願赦過宥罪  
紀德書功玉曆登名盡洗今生之業垢金符

垂二

八

度命益培來世之昌基數周而劫劫長新運  
值而生生受福不經幽暗永處光明法衆運  
誠輒伸善頌

地官班列鎮羅豐

赦罪恩宏聞望崇

四十二曹承化日

百千萬載贊真風



刑編幸削書愆跡

德籍應彰受度功

惟願覃恩昭萬類

他生遊宴玉華宮

弟子拜退天尊引至

水官座前設拜

以今恭焚寶香供養

賜谷清泠宮下元三品解厄水官大帝君恭  
惟聖造權領水官凡學士百姓子生前結習  
惡緣犯下元威儀六十條他日身經太陰則  
水官四十二曹攝之如能膺戒佩符可免苦  
惱今有預修弟子某按金科而受度遵玉訣

以預修崇建寶齋懺祈瑤陛  
下元三品解厄水官大帝君伏願定名玉曆  
列字金科萬業冰清此世皈神於爐冶千冤  
雲散他生度命於陶鎔南丹之錄籍昭彰北  
鬱之簡書落滅超離地禁飛步天關法衆運

垂二

九

誠輒伸善頌

水官位望領歸墟 解厄恩隆典聖樞  
德契雲層參紫極 刑裁風澤耀黃區  
金符身佩冤愆釋 玉籙心持志氣舒  
惟願慈悲矜受度 他生步武躡天衢



弟子拜退

舉天尊號道衆歸位

向來禮謝三官功德周圓伏願道炁羅敷靈  
光煥映鑒善功之赫奕曲沛宸恩消惡業之  
便蕃密凝聖澤削罪錄而玄曹敬聽蠲愆籍  
而丹局丕承膺快樂於百年疾超凌於九夜  
即俾弟子某性天超邁心地清夷秋風飄曉  
榦之芳禍沉此日夜雨長春畦之秀福襲他  
生黑都無考對之憂朱陵遂超凌之樂從容  
受化逍遙返形紀姓字於玄圖不經輪轉標

功勲於丹格永遂升遷稽首皈依無極大道  
志心稱念

三元赦罪天尊

九天錫慶天尊

萬福護身天尊

和不可思議功德

靈寶領教濟度金書卷之一百七十一共卅



